

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
18.10 सोमवार दिनांक 24.11.2025

प्रमुख समाचार –

- न्यायामूर्ति सूर्यकांत ह आज भारत के तिरपनवां मुख्य न्यायाधीश के रूप म लीन सपथ ।
- सुकमा जिला म आज पंद्रह माओवादी मन ह पुलिस अधीक्षक अउ केंद्रीय रिजर्व पुलिस बल—सीआरपीएफ अधिकारी मनके आगू करीन आत्मसमर्पण ।
- राष्ट्रीय महिला आयोग ह हिंसा अउ उत्पीड़न जइसे संकट म झूझत माईलोगन मन बर सहायता सुनिश्चित करे बर एक नवा हेल्पलाइन नंबर सुरू करे हे ।

सुप्रीम कोर्ट मुख्य न्यायाधीश

न्यायामूर्ति सूर्यकांत ह आज भारत के तिरपनवां मुख्य न्यायाधीश के रूप म सपथ लीन । राष्ट्रपति द्रौपदी मुर्मु ह आज राष्ट्रपति भवन म न्यायमूर्ति सूर्यकांत ल पद के सपथ दिलाइन । न्यायाधीश न्यायमूर्ति सूर्यकांत ह न्यायमूर्ति बी.आर. गवई के जघा ले हे । भारत के मुख्य न्यायाधीश के रूप म न्यायमूर्ति सूर्यकांत के कार्यकाल लगभग पंद्रह महिना के होही ।

सपथ ग्रहण समारोह म उपराष्ट्रपति सी.पी.राधाकृष्णन, प्रधानमंत्री नरेंद्र मोदी, लोकसभा अध्यक्ष ओम बिरला अउ केंद्रीय मंत्री अमित शाह, राजनाथ सिंह, जे.पी. नड्डा अउ आने गणमान्य मनखे मन उपस्थित रिहीन ।

माओवादी—आत्मसमर्पण

सुकमा जिला म आज पंद्रह माओवादी मन ह पुलिस अधीक्षक अउ केंद्रीय रिजर्व पुलिस बल—सीआरपीएफ अधिकारी मनके आगू आत्मसमर्पण करे हे। आत्मसमर्पित माओवादी मन म पीएलजीए बटालियन नंबर— एक के चार हार्डकोर माओवादी घलो सामिल हे। आने आत्मसमर्पित माओवादी मन म चार पीपीसीएम तीन एसीएम अउ आठ संगठन म सक्रिय सदस्य हे। एमा पांच माईलोगिन घलो सामिल हे। ए सबो माओवादी मन उपर अड़तालीस लाख रुपिया के इनाम घोसित रिहीस।

माओवादी—सरकार पत्र

माओवादी मनके महाराष्ट्र—मध्यप्रदेस—छत्तीसगढ़—एमएमसी के स्पेसल जोनल कमेटी के प्रवक्ता अनंत ह एक कथित पत्र महाराष्ट्र, मध्यप्रदेस अउ छत्तीसगढ़ के मुख्यमंत्री मनके नाम जारी करे हे। ए पत्र म ओमन ह हिंसा के रद्दा ल छोड़के सरकार के पुनर्वास नीति के तहत जुड़े बर अवइया बछर पंद्रह फरवरी तक के अउ समय मांगे हे। ओमन ह तीनो राज्य के सरकार मनले संयम बरते के अनुरोध करत हुए सुरक्षा बल के अभियान ल रोके के अपील करे हे। अपन पत्र म एमएमसी के प्रवक्ता ह ए दारी पीएलजीए हफता नही मनाय के बात लिखे हे। संगेसंग आने—आने माओवादी संगठन मनले ए अपील करे हे कि ओमन अपन गतिविधि मन ल रोक दें।

माओवादी संगठन के कथित पत्रकार ह अपन प्रतिक्रिया देवत हुए उपमुख्यमंत्री अउ गृहमंत्री विजय शर्मा ल कहे हे कि माओवादी अपन मांग ल लेके यदि कोनो ठोस प्रस्ताव भेजही, त सरकार ओखर उपर विचार करही।

मुख्यमंत्री—केंद्रीय खाद्य मंत्री—मुलाकात

मुख्यमंत्री विष्णुदेव साय ह आज नई दिल्ली म केंद्रीय खाद्य अउ उपभोक्ता मामला के मंत्री चिराग पासवान ले भेंट करीन। मुख्यमंत्री ह बिसेस रूप ले राज्य म खाद्य सुरक्षा, कृषि आधारित उद्योग अउ फूड प्रोसेसिंग सेक्टर ले

जुड़े जरूरी मुद्दा उपर धियान खिचिन। मुख्यमंत्री ह केंद्रीय मंत्री ले आग्रह करीन कि नेशनल इंस्टीट्यूट ऑफ फूड टेक्नोलॉजी, एंटरप्रेन्योरशिप एंड मैनेजमेंट संस्थान के स्थापना छत्तीसगढ़ म करे जाय, जेखर ले राज्य के युवा मन ल आधुनिक खाद्य तकनीक, उद्यमिता अउ नवा रोजगार ले संबंधित उच्चस्तरीय प्रसिक्षण के लाभ मिल सकय। मुलाकात के दउरान मुख्यमंत्री ह ए अनुरोध घलो करे हे कि वर्ल्ड फूड इंडिया के रीजनल समिट के आयोजन रईपुर म करे जाय।

केंद्रीय मंत्री चिराग पासवान ह किहीन कि ओमन ह ए बिसय म हर संभव सहयोग दिही अउ एमा गंभीरता ले बिचार करही।

नई श्रम संहिता

केंद्र सरकार ह श्रम कानून मन ल सरल अउ कारगर बनाय के उद्देश्य ले चार नवा श्रम संहिता ल लागू कर देहे। ए चारों श्रम संहिता मन के लागू होय ले न्यूनतम वेतन के अधिकार, माईलोगिन मन ल समान वेतन के प्रावधान, फिक्स्ड टर्म कर्मचारी मन ल ग्रेच्युटी, हरेक श्रमिक मन बर सामाजिक सुरक्षा, मुफत स्वास्थ्य जांच के सुविधा अउ जादा समय बर दुगुना वेतन जइसे बेवस्था पूरा देस म सुनिश्चित करे रिहीन।

उपमुख्यमंत्री अरुण साव ह किहीन कि ए कानून के लागू होय ले चालीस करोड़ श्रमिक मनके सुरक्षा सुनिश्चित होही। संगेसंग श्रमिक मनके जीवन स्तर म घलो सुधार आही।

उहें, भिलाई इस्पात मजदूर संघ के उपाध्यक्ष शारदा गुप्ता ह किहीन कि नवा श्रम कानून निश्चित रूप ले श्रमिक मन बर लाभकारी साबित होही।

राष्ट्रीय महिला आयोग ह हिंसा अउ उत्पीड़न जइसे संकट म झूझत माईलोगन मन बर तुरते अउ जादा अच्छा सहायता सुनिश्चित करे बर एक नवा हेल्पलाइन नंबर—एक चार—चार—नौ सून्य (14490) सुरु करे हे। अपन बात म आयोग ह किहीन हे कि ए टोल फ्री नंबर आयोग के मौजूदा हेल्पलाइन ले जुड़े नवा हेल्पलाइन नंबर हे, जेन हिंसा उत्पीड़न या कोनो भी प्रकार के आयोग के सरलग परयास ल मजबूत करही।

आवास मेला

मुख्यमंत्री विष्णुदेव साय काली रईपुर के शंकर नगर स्थित बीटीआई मैदान म तीन दिवसीय राज्य स्तरीय आवास मेला म छत्तीसगढ़ हाउसिंग बोर्ड के दू हजार साठ करोड़ रूपिया के आवासीय परियोजना के सुभारंभ करीन। ए पचपन परियोजना राज्य के छब्बीस जिला म सुरु होही, जेखर जरिया ले बारह हजार ले जादा किफायती अउ गुणवत्तापूर्ण मकान बनाय जाही। ए बेरा म मुख्यमंत्री ह हाउसिंग बोर्ड के एआई चैट बॉट अउ पोर्टल के घलो सुभारंभ करीन। ए जरिया ले उपभोक्ता मन ल हाउसिंग बोर्ड के आवासीय परियोजना के जानकारी सरलता ले मिल सकही।

ए बेरा म मुख्यमंत्री ह किहीन कि राज्य सरकार ह हाउसिंग बोर्ड के सात सौ नब्बे करोड़ रूपिया के कर्ज ल देके बोर्ड ल कर्जा ले मुक्त कर देहे, जेखर ले बोर्ड अच्छा रणनीति के संग काम करें। ओमन ह किहीन कि प्रधानमंत्री ग्रामीण आवास योजना के तहत दू बछर म राज्य म ए योजना के तहत छब्बीस लाख लोगन मन ल आवास के मंजूरी दे गीस। मुख्यमंत्री ह ए बेरा म आवास बुकिंग के प्रमाण पत्र, हाउसिंग बोर्ड के उपभोक्ता ल आवास के चाबी अउ फ्री होल्ड मकान के प्रमाण पत्र दीन।

ए बेरा म विधानसभा अध्यक्ष डॉ. रमन सिंह, आवास अउ पर्यावरण मंत्री ओ.पी. चौधरी के संग आने जनप्रतिनिधि उपस्थित रिहीन।

धर्मेन्द्र—निधन

जाने माने फिल्म अभिनेता धर्मेन्द्र के आज मुंबई के एक अस्पताल म निधन होगिस। ओमन नवासी बछर के रिहीन। उन्नीस सौ पैतीस म जनमे धर्मेन्द्र ह फिलिम “दिल भी तेरा हम भी तेरे” ले अपन फिल्मी सफर के सुरुआत करीन अउ शोले, सत्यकाम, चुपके—चुपके, मेरा गांव मेरा देश, नौकर बीवी का, आई मिलन की बेला, प्रतिज्ञा, धरमवीर जइसन फिल्म के जरिया ले अपन अच्छा अभिनय के परिचय दीन। छै दसक ले जादा के करियर म ओमन ह तीन सौ ले जादा फिलिम म काम करीन। धर्मेन्द्र ल बछर दू हजार बारह म पद्मभूषण आवार्ड ले सम्मानित करे गे रिहीस।

राष्ट्रपति द्रौपदी मुर्मु, प्रधानमंत्री नरेंद्र मोदी अउ छत्तीसगढ़ के मुख्यमंत्री विष्णुदेव साय ह अभिनेता धर्मेन्द्र के निधन म सोक जतइन। एक सोसल मीडिया पोस्ट म प्रधानमंत्री श्री मोदी ह किहीन कि धर्मेन्द्र के निधन भारतीय सिनेमा म एक युग के अंत हे।

उहें, मुख्यमंत्री श्री साय ह किहीन कि धर्मेन्द्र ह अपन सशक्त अभिनय, सिनेमा बर समर्पण अउ विलक्षण प्रतिभा ले करोड़ो दर्सक मनके दिल म जघा बनाइन। उंखर जाना भारतीय कला जगत बर एक बड़का क्षति हे।

प्लांट—आगजनी

दुरुग जिला के नंदिनी थाना क्षेत्र के गांव मुरमुंडा स्थित एक निजी फ़ैक्ट्री म काली रतिहा आगी लग गीस। ए दउरान फ़ैक्ट्री के अंदर राखे केमिकल ड्रम म ब्लास्ट हो गीस। अग्निसमन अउ आपात कालीन सेवा के छै टीम ह तीन घंटा ले जादा परिश्रम करे के बाद आगी म काबू पाइन। दुरुग के अग्निसमन अउ आपाल कालीन सेवा के प्रभारी नागेंद्र कुमार सिंह ह सॉर्ट सर्किट के कारण आगी लगे के संभावना जताय हे। ए मामला म पुलिस ह जांच पड़ताल म जुटे हे।

फुटबॉल प्रतियोगिता

जगदलपुर म होवइया अखिल भारतीय फुटबॉल प्रतियोगिता के फाइनल मुकाबला रामकृष्ण मिसन नारायणपुर के टीम ह जीत ले हे। फाइनल मुकाबला म रामकृष्ण मिसन नारायणपुर के टीम ह पेनाल्टी सूट आउट म चेन्नई पुलिस तमिलनाडु के टीम ल चार-तीन ले हराके खिताब जितिन। दूनो टीम निर्धारित समय तक एक-एक गोल के बराबरी म रिहीस। निर्धारित समय तक कोनो भी टीम डहार ले बढ़त नहीं बनाय म एखर निर्णय पेनाल्टी सूट आउट के जरिया ले करे गीस।
